

den) fur gebildet/ die sünde vnd gnade/ das
sie vns teglich vnd jerlich/ durch den Winter
vnd Sommer furgepredigt werden / wenn
wir ohren zu hören vnd augen zu sehen het-
ten. Solcher geistlicher deutung nach/ ist A-
dam im schönen Lentzen erstlich gewesen (daer
auch leiblich im Lentzen im anfang des iars
geschaffen ist) Bald aber durch die sünde den
geistlichen Winter vber sich bracht hat/
Welchen Christus die liebe sonne widerumb
vertrieben/ vnd den Lentzen angefangen. Vnd
gehet nu also/ Wer im Lentzen lebt der stirbet
nimer mehr/ Wer im Winter stirbt/ der lebt ni-
mer mehr/ das ist/ wer Glaubt vnd Getaufft
wird/ der wird selig/ Wer nicht glaubt/ wird
verdampft. Denn diesem entgehet die Sonne/
jenem gehet die Sonne auff / von welcher
David hie weissagt.

Nicht allein das vom Winter vnd Som-
mer/ meinet David. Sondern viel mehr vnd
neher dieses geheimnis/ Das Messia Herr-
schafft / nicht solle sein wie Moses Herr-
schafft / Moses Herrschafft ist des gesetzes
Herrschafft / welchs nicht allein die sünde
nicht weg nimpt/ sondern auch mehret / das
ist/ offenbart sie/ wie gros vnd greulich sie sey/
vnd strafft sie/ dadurch der mensch erschreckt
vnd (so zu reden) Gottes gericht vnd seinem
gesetze feind wird/ durch welchs er in seiner
sünde